

Govor predsjedavajućeg Predstavničkog doma Parlamentarne skupštine Bosne i Hercegovine dr. Denisa Zvizdića na završnoj ceremoniji Twinning projekta EU "Osnaživanje i dalja podrška parlamentima u Bosni i Hercegovini u poslovima evropskih integracija"

Sarajevo, 18. oktobar 2021.

Poštovani prisutni,

Cijenjeno rukovodstvo oba doma Parlamentarne skupštine BiH, predsjedavajući i entitetskih parlamenata i Skupštine Brčko Distrikta, predsjednici kantonalnih skupština, Uvažene ekscelencije, predsjednici Kaver, predsjednici Sobotka, izaslanici Pavić, uvažena zamjenica šefa Delegacije Evropske unije u BiH gospođa Dorodnova, uvaženi šefi Projekta gospodin Horvat,

Dame i gospodo,

Veliko zadovoljstvo mi je obratiti se na završnoj ceremoniji Twinning projekta Evropske unije pod nazivom „Osnaživanje i dalja podrška parlamentima u Bosni i Hercegovini u poslovima evropskih integracija“. Odmah na početku referirajući se na dvije komponente naziva Twinning projekta koji danas službeno završava. Prva komponenta je „osnaživanje“. To je riječ koja ima veliki značaj, jer nama u Bosni i Hercegovini treba podrška Evropske unije, trebaju nam pozitivna iskustva, dobre prakse i metodologija uspješnog funkcionisanja parlamenata u EU. Parlamenti su u procesu evropskih integracija ključne institucije, jer iako je izvršna vlast nosilac tehničkog i operativnog dijela pripreme dokumenata kojima se vrši usklađivanje sa pravnom stevinom EU, zakonodavna vlast je ta koja usvaja zakone i daje saglasnost na različite dokumente. Obavljao sam preko 4 godine funkciju predsjedavajućeg Vijeća ministara BiH i tada smo imali najveći napredak na evropskom putu u postdejtonskom periodu. Ratificirali smo SSP, predali zahtjev za članstvo u EU, jednoglasno odgovorili na 3242 pitanja i 655 dodatnih pitanja iz Upitnika Evropske komisije, nakon čega smo dobili Mišljenje Evropske komisije sa 14 prioriteta, usvojili smo niz cjelodržavnih strateških dokumenata koji su nam otvorili EU fondove i grantove itd. Međutim, taj napredak ne bi bio moguć bez konstruktivne uloge parlamenata na svim nivoima vlasti. Zakonodavna vlast je u pravom smislu te riječi „glas naroda i građana“. Bez jakih i „osnaženih“ parlamenata nema neophodne političke podrške i kvalitetnog transponiranja propisa Evropske unije u zakonodavstvo Bosne i Hercegovine.



Druga, ne manje važna komponenta naziva Twinning projekta koji danas finaliziramo je „dalja podrška parlamentima u Bosni i Hercegovini u poslovima evropskih integracija“. Ta komponenta ukazuje na nešto što nam je neophodno, a to je kontinuitet saradnje i podrške Bosni i Hercegovini u poslovima evropskih integracija. To nam šalje poruku da moramo nastaviti sa novim projektima u budućnosti, jer bez kontinuiteta nema ni dugoročnih rezultata. Twinning projekat koji danas okončavamo možemo ocijeniti uspješnim, ali još bolje bi bilo da nastavimo putem koji smo započeli, sve do krajnjeg cilja, a to je – članstvo Bosne i Hercegovine u Evropskoj uniji. Uvjeren sam da će do i to vrijeme, bez obzira na stanje u kojem se trenutno nalazi Bosna i Hercegovina. Neka današnji dan bude ponovno vraćanje evropske perspektive Bosne i Hercegovine u fokus pažnje cjelokupne javnosti, jer evropska perspektiva donosi Bosni i Hercegovini sve ono što nam treba, a to je mir, prosperitet i stabilnost.

Lično sam imao priliku u februaru ove godine staviti svoj potpis na Zajedničku izjavu o podršci Plana prioriteta za parlamente u BiH za ubrzanje procesa evropskih integracija. Neki od prioriteta su uspješno realizirani i estitam rukovodstvu Projekta na tome. Revidirani su i ažurirani akcioni planovi za unapređenje uloge parlamenta u procesu pristupanja EU za svaki parlament u BiH, izrađeni su akcioni planovi za komuniciranje o EU za svaki parlament, vrše se kontinuirane edukacije, obuke i radionice, analiziraju se pravni propisi, vrši se parlamentarna saradnja itd. Međutim, želim naglasiti da sam posebno ponosan na činjenicu da je uz veliki napor rukovodstva oba doma Parlamentarne skupštine BiH osigurano adekvatno funkcioniranje Parlamentarnog odbora za stabilizaciju i pridruživanje. Time je u cijelosti realizirana tačka 1. iz Plana prioriteta koji smo potpisali i prioritet broj 3. iz Mišljenja Evropske komisije o zahtjevu BiH za članstvo u EU. Način na koji je ovaj Parlamentarni odbor stavljen u funkciju primjer je kako politički akteri u Bosni i Hercegovini mogu pronaći kompromis i staviti opći interes iznad bilo kojeg drugog interesa. U junu ove godine smo uspješno održali zajedničku sjednicu sa predstavnicima Evropskog parlamenta i time smo trajno stavili u funkciju ovo važno tijelo. Dakle, da bismo stavili u funkciju ovaj Odbor morali smo se svako od nas odreći nekih svojih političkih pozicija i na kraju smo dobili kvalitetan rezultat. To se u najkraćem može nazvati političkom odgovornošću i spremnošću na kompromis i to građani sa pravom od nas očekuju. Mislim da je to matrica koju trebamo koristiti i za realizaciju ostalih prioriteta, kako iz Plana prioriteta koji smo usvojili, tako i 14 prioriteta iz Mišljenja Evropske komisije.



Naravno, u tom pogledu predstoji nam težak i naporan posao, te koristim ovu priliku da pozovem sve političke aktere i druge koji su uključeni u proces EU integracija da se vratimo na evropske tražnice. Prvi korak je nastavak realizacije 14 prioriteta i sticanje kredibilnih uslova za dobijanje kandidatskog statusa. Do sada smo postigli određeni napredak, održani su lokalni izbori u Mostaru, osigurano je pravilno funkcionisanje Parlamentarnog odbora za stabilizaciju i pridruživanje, usvojena je Strategija za borbu protiv korupcije, usvojen je Strateški okvir za reformu javne uprave i akcioni planovi, ukinuta je smrtna kazna u Ustavu Republike Srpske itd. Međutim, to nije dovoljno. Predstoji nam ozbiljan angažman koji je direktna nadležnost i odgovornost Parlamentarne skupštine BiH, a to je usvajanje tri važna systemska zakona: Zakona o javnim nabavkama, Zakona o sprežavanju sukoba interesa i izmjene i dopune Zakona o VSTV-u.

Na kraju, kao što sam već rekao, aktuelnu situaciju u Bosni i Hercegovini ne želim predstavljati ružičastom. Ona to u ovom trenutku nije. Naprotiv, situacija je vrlo složena i može otići u pravcu kojim bi bila ugrožena stabilnost i sve ono što je urađeno u zadnjih 25 godina. Ali sve što sam naveo u ovom obraćanju ima za cilj da nas vrati na jedini put kojim možemo ići, koji nema alternativu, put unutrašnje saradnje i reintegracije i evropskih integracija. I što je još važnije, ciljano sam iskoristio ovu priliku da govorim o porukama budućnosti, nikako o porukama prošlosti ili porukama sadašnjosti, koja nažalost u ovom trenutku ne nudi optimizam. Nadam se da ćemo svi zajedno pokazati zrelost i političku odgovornost i da ćemo umjesto retorike podjela i sukoba, poći ponovo govoriti o retorici saradnje i da će neki naredni Twinning projekat imati za temu kako pomoći Bosni i Hercegovini u procesu otvaranja pregovaračkih poglavlja za članstvo u EU, što je jedina vizija budućnosti koju ja vidim, a koju siguran sam žele i građani Bosne i Hercegovine i to u procentu od preko 75% prema zadnjim anketama.

Hvala vam na pažnji!